

'Sëédhe =ple -naa 'ö Pɔdhö -ya bɔ

Atanna -bha 'kɔdhigüme -nu 'wo

## 2 Tesadhonikö

-pö 'gü -a -nu -dhe

**1** <sup>1</sup>Me 'ka Atanna -bha 'kɔdhigüme -nu 'ka 'e "pepedhö Tesadhonikö -pö 'gü, 'ö 'ka -ya -sü 'ka kwa Dë bha waa- kwa Dëme Yesu Klisi -nu -bha -ya 'gü, mang Pɔdhö -me 'dhö, Sidhiven 'dhö, Timote 'dhö, yi -në 'yi 'sëédhe ya- bɔ ka -dhe. <sup>2</sup>Atanna 'ö -kë kwa Dë 'ka bha waa- kwa Dëme Yesu Klisi, -wo ka gba zuëwaanüsü 'ka, kö -wo -gasite kë ka -dhe yi -gban "pepe 'ka.

Za 'ö dho dɔ Klisi nu -yi 'ka -a -dhiang 'ö Pɔdhö  
-ya zë Tesadhonikö -me -nu -dhe

<sup>3</sup>-A -dhea -bha -dhe 'yi Atanna nué" bho yi -gban 'ka ka -wɔn 'gü, n dheebhang -nu. "Kee 'sa -a kë -kɔ 'kö 'dhö 'yö bha, -a -gen -mü -dhe ka -bha -zɔ -yö Atanna -dhe -sü 'bha -në -da sië- -ta do 'ö dho- 'ka, waa- ka -dhɔ -bha ka 'ko kë -sü 'dhö. <sup>4</sup>Yö -në- -wɔn 'gü 'yö yi -gen gbɔ 'dhö "gblügbliü Atanna -bha 'kɔdhigüme -nu kpö 'gü -dhe 'gbe 'gü -deε, -a -gen -mü -dhe Atanna -wɔn 'ö ka -gɔ "yi 'yaa zun- -bha, ka 'dhang bho -sü -ya "dhiü 'kpakpadhö. 'Wɔn -nu 'wo- -wɔ ka -ta ka -bha 'dhang -bho Yesu Klisi "dhiü -sü -wɔn 'gü, saan" -nu 'ka- wo, -a 'bha 'yii ka -kɔ bho Atanna -wɔn -bha. -Yö yi zué" -nii -da -dedewo.

<sup>5</sup>Me -ya 'wɔn -dɔ yö -në- -bha -dhe: -Yö -dɔ 'wɔn bho -dhe 'ka 'koo, -dhe 'yaa du 'to 'wɔn 'bha -bha. =Dhe -yö teanwɔn -dɔ 'ö -me -gɔ. Yö -në- -wɔn 'gü, 'yö 'ö -kɔ -ya ka -bha kö -a -bha -gblüdedhe 'ö ka -wëédhe 'dhö bho sië- -wɔn 'gü bha, 'ka ka -due yö mü. <sup>6</sup>Yö -në- -zɔn -dhe 'wɔn 'ö Atanna dho- kë bha pö 'yaa- -bha; -a -gen -mü -dhe -yö -dho 'wɔn "gbu- wɔ 'me

'wo ka -wëédhe bho sië bha- -nu -ta. 7'Yö 'me ka -wëédhe -ya bho bha ka gba -ya -du 'flëë- 'gü -sü 'ka yi "piü yi 'ö kwa Dëme Yesu dho 'go- 'ka dhang- 'gü 'ö nu, waa- -bha "kië 'gü "gbu- -nu 'wo- -bha medhe -gban -wlöö -a -nu 'dhö bha- 'ka, 8kö peng 'næ- -yö dɔ sië- -nu -ta -mlangmlangdhö (Atanna -bha 'gügbudhe 'ka), 'yö 'wo 'wɔn -wɔ 'me 'waa Atanna dɔ, waa- 'me 'waa wo -gɔ 'dho 'sia- 'wɔn -taɔng -së 'ö -gban kwa Dëme Yesu -bha bha- -dhe, 'ö 'waa 'dhang bho- "dhiü bha- -nu -ta. 9'Güseedhe 'ö- -naa 'to -dhe 'yaa 'dhö -në dho wɔ- -nu -ta. -Wo -dho kë kwa Dëme 'ka -gbleen, 'wii 'dho wo -gen -da -a -bha -gblüédhe -bhlëësü 'ö- -mɔɔ- 'ka 'yaa 'dhö bha- kë -dhe 'gü. 10-Ya kë -dhe -a nu -yi bha -ya -loo, me "pepe 'kwa "wɔ -sü 'ka- -wɔn -bha 'ö 'kwa -ya -sü 'ka- -bha -ya 'gü bha, kwa -dho -a 'tɔ bho, 'ö 'kwa waa -loo- -dhe. Kaa -du 'pö ka -dho kë 'me 'wo "dhü bha- -nu kpö 'gü, -a -gen -mü -dhe ka 'dhang bho -sü -yö Atanna -bha naɔ 'yi- dɔ ka -gɔ bha- "dhiü, 'ö 'ka -ya -sü 'ka- -bha -ya 'gü.

11Yö -në- -wɔn 'gü 'pö, 'yö yi 'gü 'yaa ga -bhea ka -wɔn 'gü -sü 'ka, kë "dhü kö -yö ka -ta 'kun, kö 'wɔn -së 'ö ka -dhe 'ka bha 'ka ka -due yö- -bha, kö- -du -bha faan 'ö- 'gü bha, -ya 'bha -da ka 'gü, kö 'wɔn -së "pepe 'ö- kë -dho 'dhö ka -bha kö ka -kɔ -yö -mɔɔ- -gban kë -sü -bha, kö ka 'dhang bho -sü 'ö- "dhiü bha 'ka- 'gü -ta 'sü. 12-Ya kë "dhü, kwa Dëme Yesu 'tɔ- -dho bho ka -bha, 'yö kaa -du 'pö ka 'tɔ 'dhö bho -a 'saa- 'gü, -gasite 'ö waa- kwa -bha Atanna 'wo- -kë ka -dhe bha- -wɔn 'gü.

**'Wɔn 'ö -gban Klisi nu -sü -bha -a -dhiang -ple -naa  
'ö Pɔdhö -ya zë Tesadhonikö -me -nu -dhe**

**2** 1-Ya 'to- 'dhe 'kö -gban kwa Dëme Yesu Klisi nu -sü waa- kwa -lookota -sü 'ö- -kuu "dhiü bha yö -zë -bha, n dheebhang -nu, a -bhea ka -dhe kö 2'suü 'ya 'dho -da ka 'gü 'ö ka "gblüédhë -yan -gban -yö wü "dhü -beang 'ka -dhe yi 'kpii- bha -ya -loo. -A -gen -mü -dhe me- -dho -sloo 'wo nu 'wo ka zuë" -kaan "kwëë wo -wu 'ka 'wo -suasua -nu -kë ka -dhe 'wo- pö wo -zë Atanna -bha 'Nii- -ya dhiang zë wo -dhe, -dhe kwa Dëme -bha za dɔ -yi bha -ya -loo, -wo -dho -mɔɔ- -bha 'wo- pö -dhe me- Atanna -wu "dhiü -loo me -bha, "een -dhe me -ya -wu pö me -dhe, "een 'wo- pö 'zü -dhe yi -në 'yi 'sëédhe bɔ- -nu -dhe 'yi- pö -dhe kwa Dëme nu -yi bha -ya -loo. "Kæe -waa- pö ka -dhe "dhü, 'ka 'dho ka 'tu 'to- -bha!

3Me 'bha 'ya 'dho "kpënn- kë ka -gɔ -kɔ 'bha -bha 'bha 'gü 'ö 'ka 'dhang bho- "dhiü. -A -gen -mü -dhe "sanni yi 'ö "dhü bha -yö -loo, kö me -gban -wa wo -taa yö Atanna -gɔ, kö- -bha 'tɔng- -bhlëësiömë 'ö- "dhiütodhe dho kë 'güsesü -në- 'ka bha -në -ya nu.

4Me 'ö bha -yö -dho 'ö -du fië- bho pë "pepe 'kö 'wo- -dhe -zlan "kpong ya- -taa, 'ö 'wo- -dho -zë -kë -a -gban "pepe -bha. -Yö -dho 'dho- "dhiü 'ka "dhü 'ö dho 'ö -ya Atanna -dhökëgükɔ -nu -gban -zian 'gü 'ö- pö yö -në 'ö Atanna 'ka.

5 "Een 'wɔn -nu bha- pö 'a gun- wo sië ka -dhe kö a ka 'piü mü bha -ya 'go ka 'yaan -ee? 6 'Sa 'pë 'ö- -wɔn 'gü 'yö 'wɔnmakoomë 'kpïi- bha 'yii nu -kö bha ka -dɔ. -A -wɔn 'gü 'yii kè 'dho =mɔɔ nu -sü -bha kö -a nu "tüng 'ö Atanna -ya -ya 'yii -loo -kö. 7 'Sa -a 'wɔn yaa kè -faan 'ö -bin -sü 'ka bha, yö -zè -ya -da -sü zü bho 'nu mɛ "bhu- -nu 'gü. 'Wɔn do 'ö -ya 'to yö -mü -dhe kö 'mɛ 'ö zun -sü 'ka- gɔ zian- bha yö -nè -yö 'go- gɔ zian-. 8 'Yö -zè -ya 'go- gɔ zian- yi 'ö- 'ka kö 'wɔn yaa -gɔɔakpluu bha- nu "tüng -ya -loo. "Kɛɛ -ya kè -dhe kwa Dème Yesu -ya nu, "tɛɛ 'ö go- "dhi -yö -dho mɛ bha- zè, 'yö- -bha mɛdhe 'bhü 'ö dho nu- 'ka bha- -kè "gbu- -sü bha 'ö -kè 'wɔn yaa -gɔɔakpluu bha- -bha -bho "dhiü -sü 'ka. 9 'Wɔnmakoomë bha- -dho 'ö zü -gban Sɔtraan =nè- 'gü, 'yö nu 'yö "dhabhliwɔn "gblügblü -nu waa- 'wɔn -nu 'ö mɛ yaa- -dhe yö 'ö- 'wɔn -yö mɛ kɔn, 'ö teanwɔn ma mɛ "bhu- -gɔ 'koo bha- =gban "pɛpɛ suu -kè, kè "dhü kö 'ö- -nu -zian kè- -bha. 10 -Yö -dho "slè suu yaya =gban 'do 'do kè mɛ "bhu- -nu -gɔ kè "dhü kö 'ö zian =dhen- -nu -gɔ. -A -kɔ -dho =mɔɔ 'mɛ 'wo =dhen- -nu 'ka -a -nu -bha, teanwɔn 'ö dho- -nu dha 'nu bha- -dho 'ö 'yii- -nu kè 'ö 'wii 'wi- -wɔn -bha bha- -wɔn 'gü. 11 "Wɪ 'ö 'wii- wo teanwɔn bha- -bha "dhü bha =nè -wɔn 'gü, 'yö Atanna dho 'dhang -bho =sua -wɔn -nu "dhiü zuëga -da -nu "gblüü-, kè "dhü kö =wa =sua -zian kè- -nu -dhe kö -yö bho- -nu 'gü tean- -bha. 12 Kö mɛ "su mɛ 'ö 'wii 'dhang bho teanwɔn "dhiü 'ö 'wɔn yaa kè -sü =nè- "dhia -yö gun- -nu 'gü bha Atanna -bha za -ya -nu zè.

### Dhiang 'ö Pɔdhö -ya zè 'ö -gban Atanna -bha kwa -ya 'ö -bha -ya 'gü -gen -bha

13 N dheebhang -nu, ka -dho -yö kwa Dème -kè =dedewo, -a -wɔn 'gü -a -dhea -bha =dhe 'yi Atanna nue" bho yi =gban "pɛpɛ 'ka ka -wɔn 'gü. -A pö 'a- wo "dhü bha- 'klɔɔ- -mü =dhe -yö ka -ya -dɪ -ta 'wɔn =gban zübhö "tüng 'gü kö- -bha 'Nii- "slüüslü -yö ka "zu, kö 'ka 'dhang bho teanwɔn bha- "dhiü kö 'ka dha. 14 'Wɔn -taɔng -sè 'ö -gban Yesu -wɔn -bha, 'ö 'yi- pö ka -dhe bha =nè Atanna -yö bɔ- -ta, 'yö ka -dhe kö 'ka kè dha -mɛ 'ka, kö 'ka kè -toseakème 'ka kwa Dème Yesu Klisi -bha 'tɔbhɔdhe yi 'ka dhia". 15 =Dhe 'ö "dhü, n dheebhang -nu, -ka dɔ kwa Dème -bha zian bha- -ta gbenngdhö, kö 'wɔn -nu 'yi ka -klang -kè 'ka yi 'dhi oo, -a 'dhe 'yi- -ya 'sëédhe 'gü 'yi- bɔ ka -dhe oo, kö 'ka dɔ 'gbu- ka -zu 'ya 'dho bho- 'bha 'ka, "kɛɛ kö 'ka- ma kö 'ka- 'gü -wɔn kè.

16 Kwa Dème Yesu Klisi yöö =dede, waa- kwa Dè Atanna, 'ö kwa -dho -ya -kè, 'ö -gasite -kè kwa -dhe 'ö kwa gba faan 'ö 'yaa yèn -a 'ka, 'ö kwa saan -sè -ya -sü 'ka -dhekpɔɔ dhia" 'gü bha, 17 -wo ka -zu -gban kö -wo ka faan dɔ 'wɔn -sè -dɪ -slɔɔ =nè- kè -sü -bha, kö -wo ka -ta 'kun kö -wu "pɛpɛ 'ö dho 'go ka "dhi -yö kè -wu -sè =nè- 'ka.

### 'Pë 'ö Pɔdhö -ya pö Tesadhonikö -mɛ -nu -dhe -bhea -wo -wɔn 'gü -sü -wɔn 'gü

3 1 'Ö "dhü 'pö, n dheebhang -nu, -ka bhea" Atanna -dhe yii -dɪ 'pö yi -wɔn 'gü kö kwa Dème -wu yi- pö sië bha -yö sa kö -yö 'dho -dhe

-gban "pepe 'gü, "keε kö -wa -bhlëë -ya 'pö -dhe -ko 'ka- -bhlëë -ya sië 'ka ka kpö 'gü bha- 'dhö. 2-Ka bhea" 'pö yi -wɔn 'gü kö Atanna -yö yi dha 'gblüyaame -nu 'wo 'wɔnmakoomε -nu 'ka bha- -nu -gɔ. -A -gen -mü -dhe mε -gban "pepe -zë 'wii 'dho kē 'dhang bho kwa Dëme Yesu "dhiü -mε 'ka.

3"Kεε kwa Dëme bha 'yaa -wu -plε pö, -yö -dho ka gba faan 'ka 'ö ka dha Sɔtraan -gɔ.

4-Yö yi -zu -gban -sü 'ka 'kpakpadhö -dhe -dhio 'yi- dɔ ka -ta bha ka- 'gü -ta 'sü sië, -dhe ka -dho -a kē "dhü 'ka dho- 'ka "dhiü -kpεawo.

5Kwa Dëme bha -yö Atanna -dhɔ -da 'ka -zu -bha, kö zuëseadhe 'ö gun- -gɔ bha -ya nu ka -dhe.

### Yë kē -dhio 'ö Pɔdhö -ya dɔ Tesadhonikö -mε -nu -ta

6Yi -dhio -dɔ ka -ta, yi dheebhang -nu, kö 'ka 'ta -kɔ -së kē, "keε mε 'dhe 'kö yö -zë 'ö -gleng 'yi- -da ka -bha bha- -gban to 'ö -tosea -kē "fuufuudhe 'gü, yi- -dhe ka -gɔ kwa Dëme Yesu Klisi 'tɔ 'gü kö 'ka "kan- -mε -bha. 7-Tosea kē -kɔ 'yi- -kē 'ka ka kpö 'gü kaa =dede ka- -dɔ. -A -wɔn 'gü, -a -pö ka -dhe -gen 'yaa 'dhö =dhe -ka yi -gen -ga; -a -gen -mü =dhe ka -wɔn -dɔ =dhe 'yii -tosea kē "fuufuudhe 'gü. 8'Yii -da mε 'bha 'gü köngga 'ka kö yi- -bha pë -bhö -gɔ "wεwεε, sëë =në 'yi- bho, yë =në 'yi- -kē yi -kɔ 'ka "binma -dhekpao, saan" =në 'yi- sü 'yö 'yi yi -gɔ -wɔn -nu -kē, kē "dhü kö yi -kwεε 'ya 'dho 'ma mε 'bha 'ka. 9'Yii kē -dhe -a kē 'yi gun- wo sië "dhü bha, -ya kē "dhü kö 'yaa =mɔɔ =në- wo- -bha 'nu kö 'yi yi -kwεε -ya ka -gbin- Yi- -kē "dhü kö 'ka yi -gen =në- -ga kö 'ka ka -bha kē -dhe yi -bha 'dhö. 10-A -gen -mü -dhe 'yi gun ka "piü mü bha -dhio 'yi- dɔ ka -ta yö -mü -dhe 'ka yë =në- kē. -Dhe mε "bu mε 'ö 'yaa "wɪ- -bha kö -yö yë kē, -a -dhe 'yaa -bha -dhe- -mε -yö pë -bhö 'pö.

11"Kεε yö -zë -gban 'gü, 'ya -ya yö, yi- -ma -nu wo -dhe mε 'bha -nu -wo ka kpö 'gü 'ö 'waa "wɪ- -bha kö -wo yë -zë kē, 'ö 'wo "wlaa- =në zë sië "wεwεε 'yö 'wɔn 'yaa- -nu -bha 'wɔn 'ka 'wo- -kē woo- 'wɔn 'ka. 12'Mε 'wo "dhü bha yi- -dhe -nu -gɔ 'ö 'yi- -dhio dɔ- -nu -ta glɔglɔdhö kö -wa zë wo -bha -kē kwa Dëme Yesu Klisi -bha mε 'ka -sü -wɔn -dhe kö -wo dɔ "gbu- -wo wo -dɪa yë kē kö -wo wo -bhöpë -slɔɔ -wa -bhö.

13"Kεε ka -zë ka 'gü 'ya 'dho ga 'wɔn -së kē -sü 'ka, n dheebhang -nu. 14'Mε 'yii -dhio 'yi dɔ sië ka -ta 'sëédhe ya 'gü ya- 'gü -ta wo, -ka ka 'yan 'kpɔ- -mε "piü kö 'ka "kan- -mε -bha kö 'yiü- -yö dɔ- -bha. 15"Kεε 'ka 'dho- 'sü -zë wo =dhe ka 'yao- 'dhö, -kaa 'sü =dhe ka dheebhang 'dhö kö 'ka- -zu -bö -a -dɪ -wɔn 'ka =siësië.

### -Tuabhonao -totaamasü

16=Ya 'go yö -zë 'gü, ('ma mε -gban "pepe ka =tua bho 'gbe,) kwa Dëme 'ö zuëyagblüü- -gɔ 'go -dhe 'ka bha -yö ka zuë" 'waanu "tüng -gban -tüng -gban 'gü, -kɔ =gban "pepe suu 'gü! -Yö 'to mε =gban "pepe ka "piü!

2th3 15 <sup>17</sup>Tuabhonaɔ 'kō ya mang Pɔdhö -me mang =dede =në 'a- yō -zë  
 -ben zë n -di kɔngga 'ka. N -kɔ "glɔv -ya -kɔ 'a- -ya 'ka 'sëédhɛ "pɛpɛ 'a- -kë  
 -a 'gü 'yö bha.

<sup>18</sup>Kwa Dëmɛ Yesu Klisi -bha -gasitɛ bha -yö kë mɛ -gban "pɛpɛ ka -dhɛ.